

Dithero tsa Tirelano mo Kutlwanong

56/2014 Thero ka Sontaga o o latolang wa bofelo morago ga moletlo wa Borarobongwe. e le ka 16. 11. 2014

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno le kwadilwe mo go Pesalome 50:6, le re: "Magodimo a bolela tshiamo ya ona; gonne Modimo ke ona o o atlholang."

1. Sefela sa 332 - 307/315

2. Thapelo: Morena Jesu Keresete, yo o leng tsogo le botshelo, yo o re baakanyeditseng tshiamo le boitumelo jwa nnete, le manno mo kgalalelong ya gago, re kopa ka ntlha ya bopelotlhomogi jwa gago gore o re abele tsogo ya mmele mo boitumelong jo bogolo, wena yo o tsogileng mo basweing, o tshela ka bosakhutleng mmogo le Rara le Mowa o o Boitshepo. Amen.

3. Lefoko la Testamente e kgologolo le kwadilwe mo go Jeremia 8:4-7;
Epistolo ka fa thulaganyong ya 2 e kwadilwe mo go Baroma 8:18-25;
Efangele ka fa thulaganyong ya 1 e kwadilwe mo go Matheo 25:31-46.

4. A go ipolelwe tumelo ya bokeresete!

5. Sefela sa 326 - 301/309

6. Thapelo ya mmadi wa thero.

7. Epistolo ka fa thulaganyong ya 6 e kwadilwe mo go 2 Bakorinthe 5:1-10, e re: "Gonne re itse gore fa ntlo ya rona ya lefatshe ya motlaagana e thujwa, re na le kago e e tswang mo Modimong, e bong ntlo e e sa khutleng kwa magodimong e e sa dirwang ka diatla. Gonne re fegelwa ka ntlha ya moo, re tlhologeletswe go apesiwa boago jwa rona jo bo tswang kwa legodimong; e le gore fa re bo apesitswe, ga re ne re fitlhelwa re sa ikatega. Gonne le rona, ba re leng mo motlaaganeng ono, re a fegelwa, re a imelwa; ka gonne ga re rate go apolwa, re rata go apesiwa godimo gore se se swang se mediwe ke botshelo. Mme yo o re etleeleditseng gona moo ke Modimo o o re neileng sebeelelo sa Mowa. Ka moo re na le bopelokgale ka metlha yotlhe, re itse gore fa re sa ntse re agile mo mmeleng, re kgakala le legae Moreneng; gonne re sepela ka tumelo, e seng ka go bona. Mme re pelokgale, re bile re eletsa bogolo go huduga mo mmeleng le go goroga go nna le Morena. Ke gona ka moo re tlhoafaletseng thata gore fa re le mo gae gongwe re se mo gae, re nne ba ba mo kgatlang; gonne rona rotlhe re na le go bonala fa pele ga sedulo sa tshekelo sa ga Keresete gore mongwe le mongwe a amogele ka fa ditirong tse a di dirileng a sa le mo mmeleng, le fa e le tse di molemo kampo tse di bosula." Amen.

8. Thero: Phuthego ya Morena Jesu, re mo Disontageng tse re khutlang ka tsona sebaka sa ngwaga wa kereke, sa tse di morago ga moletlo wa Borarobongwe. Jaaka re mo tseleng jwa go khutla ngwaga wa kereke, go molemo gore re bue ka ga dilo tsa bofelo. Re ba ba golotsweng ke Morena mo thateng ya loso, yo re tla gorosiwang ke ene mo kgalalelong ya botshelo jo bo sa khutleng, le go godisiwa ke ene go nna le ene mo pusong ya gagwe, mo go e e sa khutleng. Keresete o weditse tseo kwa a sentseng dikgole tse di neng tsa re golegela mo losong, le mo poifong tsa go latlhelwa mo molelong o go leng mo go ona lefifi le loso fela, mo lefifing le le sa feleng. Jesu o eme fa gare ga lefifi le le ntseng jalo, le fa gare ga poifo ya rona, a re: Ke ene lesedi. Jesu o sentse loso, a re tlišetsa leseding la botshelo le bosasweng ka Efangele, 2 Tim. 1:10.

Le fa re setse re golotswe mo losong, re sa ntse re tsamaya mo mogorogorong wa moriti wa loso, e bong mo losong lwa sebaka se. Mo mogorogorong o wa lefifi go a boitshega. Le Paulo ga a rate go tsamaya mo go ona, o eletsa go femelwa gore a se ka a tsena teng, mme rona go a batlega gore re se ka ra ineela mo poifong, mme re ipolele mmogo le Dafita, re re: "Ga nkitla ke boifa bosula bope; gonne o na le nna. Tsamma ya gago le seikokotlelo sa gago di a nkgomotsa," Pes. 23:4. Thata ya tsogo le tlhatlogo ya Morena Jesu ka kgalalelo e nyeletsa lefifi lotlhe le poifo ya rona.

Tsamao ya dinyaga le katamelo ya loso lwa rona ga di dire gore re boife, mme mo go tsona Morena o re fa boitumelo, rona ba re leng ba gagwe. Jaaka Paulo, re bona bokhutlo jwa dilo tsa lefatshe, le go tla ga boitumelo jo re bo baakanyeditsweng ke Morena.

Ka tlwaelo batho ga ba ka ke ba letela bokhutlo jwa botshelo jwa bona ka boitumelo. Ba ga Bhudda ba re: Morago ga loso go na le go lebalwa, le go sa akanngwa sepe sa molemo gongwe sa bosula. Bokhutlo jwa dilo tsa jaanong di tla fela fela, ba re: Ga go na sepe se se tla diragalang, tsotlhe di tla nna fela, di sa dire sepe. Ba tumelo ya batho ba re: Morago ga loso ga go na katlholo, le e seng tatlhego, ba re: Go na le go boela mo go ba bagolo, go fetoga go nna badimo, le fa ba sa itse ka tlhomamo. Ba tumelo ya batho ga ba gopole gore bagolo ba bone ga ba mo lefifing le le laolwang ke Satane, le e seng go nna mo bogosing jwa lesedi la Morena Jesu le baengele ba ba boitshepo ba gagwe.

Tse di bolelwang ke Paulo tse di ikaelelwang ke Modimo di farologana le tseo, a re: "Gonne re itse gore fa ntlo ya rona ya lefatshe ya motlaagana e thujwa, re na le kago e e tswang mo Modimong, e bong ntlo e e sa khutleng kwa magodimong e e sa dirwang ka diatla." Ka moo re na le tsholofelo e e nang le boitumelo. Botshelo jwa rona ga bo fele kwa re lebalwang teng. Fa re swa, ga re tshwarwe ke lefifi fela, ga re tsene mo kगतimping nngwe fela, le e seng mo moleteng wa ba tatlhego. Ga re botse mo go bone ba ba tsamaileng pele ga rona ka ditaola. Nyaya! Fa mokeresete a swa, ga a latlhege, ga a timele. O itumetse. Bosula le molemo tse re

kopanyeng le tsona re ntse re tshela ka kwano, di tla fetolwa go nna monate fela o o neng o sa itsiwe, le e seng go akanngwa ke motho ka kwano.

Botshelo jo re bo tshelang ka kwano bo tshwana le tente, motlaagana, ke sengwe sa nakonyana fela. Beibele e re: Dinyaga di badilwe, e re: "Di feta ka bonako, mme re fofela koo," Pes. 90:10. Ditente di a fefolwa, ga di tlhomame. Phefo e di tsaya ka botlhofu. Motho ga a ka ke a nna mo go tsona tota. Ntlo ya rona ya mo lefatsheng e ka rutliwa ka botlhofu. Ka sengwenyana mo mmeleng o ka koafala mo go maswe. Ka nthonyana o ka swa. Ka yona go bola go ka tswelela fela mo mmeleng. O ka jewa ke mmu ka pele gore o se tlhole o le teng. Ka phefonyana fela, mmele wa rona o ka nyelela, jaaka go kwadilwe mo go Pes. 103:15-16 gore "Motho ena, malatsi a gagwe a tshwana le bojang; o thunye jaaka sethunya sa naga. Fa phefo e se fokile, ga se yo, mme felo ga sona ga go tlhole go se itse."

Go ntse jalo. Le fa go ntse jalo, ga re le bale go tshwenyega ka tseo? Nyaya, re a dumela ka go ikanya tsholofetso e e reng: "Re na le kago e e tswang mo Modimong, e bong ntlo e e sa khutleng kwa magodimong e e sa dirwang ka diatla." Re na le mmele o Modimo o tla o re abelang, fa re tsosiwa mo losong, o o tshwanang le wa kgalalelo ya ga Keresete tota. Ke kago ya Modimo, e dirilwe ke ona. Ke ona fela o o nonofileng go re dira, le go re bopa sešwa. Mmele oo ga o nke o nyelela ka gope, le e seng go bola, mme o tla nna mo leseding le Morena kwa Parateiseng ya gagwe. Mo kgalalelong eo re baakanyeditswe ke Jesu ka fa Lefokong lwa gagwe le le reng: "Mo ntlong ya ga Rre go na le maago a le mantsi," Joh. 14:2. Kago eo, mmele oo, ntlo e re agileng mo go yona, ka yona Paulo a re: "E le gore fa re e apesitswe, ga re ne re filhelwa re sa ikatega." Nako e e tla, e re tla apolang kobo ya loso ka yona go apara kobo ya bosasweng. Ke boammaaruri jo bogolo jo bo reng: Ga re ka ke ra bonagala, re sa ikatega, re tla ema fa pele ga Modimo re apesitswe dikobo tsa legodimo. "Gonne tse di felang tse, di tshwanetse go apara bosafeleng, le tse di swang tse, di tshwanetse go apara bosasweng," 1 Bakor. 15:53.

Re sa ntse re lebeletse boitumelo joo. Re ntse re fegelwa, re tlhologeletswe ke go khurumelediwa jalo ka ntlo ele. Matlhoko le ditlhokego tse dintsi di ntse mo godimo ga rona. Re tsamaya mo megorogorong ya moriti, jaaka Dafita, re ntse re kopana ka metlha le dikimelo tse di bokete. Ke se le sengwe fela se se re tlisetsang tsholofelo le boitumelo, ke go solofela bosasweng le bosaboleng. Re ka eletsa go phamolwa mo maketeng ao jaaka Elia, mme fela ka fa katlholong ya Morena. Morena o tsamaya le rona, o tla kgaola loso, a re gorose kwa moseja kwa re tla apesidiwang tsa legodimo le bosasweng teng.

Re gololwa mo dipelaelong ka mafoko a a reng: "O o re direlang tseo ke Modimo." Ke ona o o dirileng legodimo, le go le re baakanyetsa, le go siamela ntlo eo ya legodimo. Ka Mowa wa ona le ka Efangele o a re bitsa, o re sedimosetsa ka dineo tsa ona, o re naya tumelo ya nnete.

Ka moo re eme ka bopelokgale, re na le tsholofelo ka ona mo go tsotlhe tse re sa ntseng re di tlhoka mono.

Mo tirelong ya rona ya Morena re ikaelela go dira tse di mo galaletsang. Re re: Le fa a bowa jaanong, re ntse re tshela, le fa e le morago, e tla re re sena go bewa mo lebitleng, a a galalediwe thata mo go tse re di dirang, re tswelele go dira, re dire tse di siameng.

Tse di molemo di itumedisa Modimo. O itumetse, fa re ntse mo tumelong, le go tshela ka Lefoko la ona, re direla Jesu ka lona. Moapostolo o kwaletse Baroma, a re: "Fa re tshela, re tshelela Morena; fa re swa, re swela Morena; ka moo, le fa re tshela, gongwe re swa, re ba Morena," Baroma 14:8.

Re tshwanetse go mo direla ka tsela e e siameng, bogolo ka e le yo o tla atlholang ditiro tsa rona. Lefoko la thero ya kajeno le ama seo ka temana ya 10. Le ba ba sa dumeleng ba tla atamela, le go bonala fa pele ga sedulo sa tshekelo sa ga Keresete, ba tla nna le ditlhong. Keresete o tla senola dinyatsego le go sa dumele ga bone. Bakeresete ba tla amogelwa go ja boswa jo ba bo bakanyeditsweng ke ene ka fa Lefokong le le reng: "Ammaaruri, ammaaruri, ke lo raya ke re: Yo o utlwang lefoko la me, a dumela ene yo o nthomileng, o na le botshelo jo bo sa khutleng, mme ga a tsene mo katlholong; o dule mo losong, a tshelela botshelong," Joh. 5:24.

Jaaka re itse gore Keresete o re tshogofaditse, o fentse loso, a a re kgothatse gore le fa loso lo ka atamela, lo se re boifise, mme re itse le mo losong boitumelo joo bo kwa pele ga lona. Re lebelela tsholofelo ya kwa moseja. A re se ka ra latlhegelwa tsholofelo eo mo tirelong ya rona. A Morena a re tshegetse mo tsholofelong eo, e se tlosiwe ke sepe. Amen.

9. Thapelo: Morena Modimo, busa dipelo le dikakanyo tsa rona ka Mowa o o Boitshepo gore re gopole ka metlha bokhutlo jwa rona, le katlholo ya gago ka tshiamo, o re tsoseletse ka ona gore re tshele, re tsamaye ka fa thatong ya gago mo sebakeng se, re nnele ruri mo go wena le mo sebakeng se se tlang ka ene Jesu Keresete, Morena le Mopholosi wa rona. Amen. Thapelo ya Morena: Rara wa rona yo o mo legodimong ...

10. Sefela sa 316 - 291/297, v. 8-11.

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke M. N. Mntambo, ka ngwaga wa 2008/2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.